

**A M A N D M A N I**  
**NA USTAV BOSNE I HERCEGOVINE**  
(APRILSKI PAKET USTAVNIH PROMJENA)

**Sarajevo, 25. marta 2006. godine**

## AMANDMANI NA USTAV BOSNE I HERCEGOVINE

Na osnovu člana X. (1.) Ustava Bosne i Hercegovine (Aneks 4. Općeg okvirnog sporazuma za mir u Bosni i Hercegovini), Parlamentarna skupština Bosne i Hercegovine, na \_\_\_\_\_ sjednici Predstavničkog doma, održanoj \_\_\_\_\_ 2006.godine, i sjednici Doma naroda, održanoj \_\_\_\_\_ 2006.godine, donijela je

### *Amandman I. Apriskog paketa*

*U Ustavu BiH u članu III. tačka 1. mijenja se i glasi:*

#### **1. Nadležnosti institucija Bosne i Hercegovine**

Nadležnosti institucija Bosne i Hercegovine su:

- a) odbrana i sigurnost;
- b) vanjska politika;
- c) vanjskotrgovinska politika;
- d) carinska politika;
- e) monetarna politika, kao što je predviđeno članom VII.;
- f) finansiranje institucija i međunarodnih obaveza BiH;
- g) politika i regulativa za useljavanje, izbjeglice, imigraciju i azil;
- h) provođenje međunarodnih i međuentitetskih krivičnihopravnih propisa, uključujući i odnose s Interpolom;
- i) uspostavljanje i funkcioniranje Suda BiH i Tužilaštva BiH;
- j) uspostavljanje i funkcioniranje zajedničkih i međunarodnih komunikacija;
- k) reguliranje međunarodnog i međuentitetskog transporta;
- l) kontrola zračnog saobraćaja;
- m) ostale nadležnosti koje se uređuju zakonom.

**Iza tačke 1. dodaje se nova tačka 2. koja glasi:**

**2. Podijeljene nadležnosti s institucijama Bosne i Hercegovine su:**

- a) poreski sistem
- b) izborni proces
- c) pravosuđe
- d) poljoprivreda
- e) nauka i tehnologija
- f) ekologija

- g) lokalna samouprava
- h) ostale nadležnosti koje se uređuju zakonom.

**Dosadašnja tačka 2. „Nadležnosti entiteta” postaje tačka 3.**

U sadašnjoj tački 3.a), na kraju teksta, umjesto tačke stavlja se zarez i dodaju riječi: “ u skladu s evropskim standardima”.

**Dosadašnje tačke 3. i 4. postaju tačke 4. i 5.**

**Dosadašnja tačka 5. postaje tačka 6.**

Iza sadašnje tačke 6.a) dodaju se nove tačke 6.b) i 6.c) koje glase:

6.b) Nadležnosti koje su prenesene na državu mogu se vratiti nazad entitetima uz jednoglasan pristanak države i oba entiteta.

6.c) Državne institucije odgovorne su za pregovaranje, izradu, usvajanje, te provođenje i funkcioniranje zakona potrebnih za ispunjavanje evropskih standarda kao i političkih i ekonomskih uslova vezanih za evropske integracije. Država osigurava poštivanje principa, prioriteta i zahtjeva koje postavlja EU u fazama prije i nakon pristupanja EU. Država će zakonom uspostaviti potrebna tijela, te preduzeti potrebne mjere i utvrditi potrebne procedure za ispunjavanje svih kriterija za pristupanje i članstvo u EU, što uključuje i potrebne mehanizme koordinacije i saradnje s organima vlasti na nižim nivoima.

**Dosadašnja tačka 5.b) postaje tačka 6.d).**

## *Amandman II. Aprilskog paketa*

**U Ustavu BiH član IV. mijenja se i glasi:**

### **Parlamentarna skupština BiH**

#### **1. Opći principi**

Parlamentarna skupština BiH nosilac je zakonodavne vlasti u Bosni i Hercegovini.

#### **2. Sastav i izbor Parlamentarne skupštine BiH**

- a) Parlamentarnu skupštinu BiH čine Predstavnički dom i Dom naroda.
- b) Predstavnički dom ima 87 članova, od čega su tri mjesta garantirana onima koji ne pripadaju konstitutivnim narodima.

- c) Članovi Predstavničkog doma biraju se na osnovu općeg i jednakog biračkog prava, tajnim glasanjem, neposredno, u skladu s Izbornim zakonom BiH.
- d) Dom naroda ima 21 člana, od kojih je sedam Bošnjaka, sedam Hrvata i sedam Srba.
- e) Članove Doma naroda posredno bira Predstavnički dom, na osnovu općeg biračkog prava u skladu s Izbornim zakonom BiH.

### **3. Trajanje mandata i podobnost članova**

- a) Mandat članova Parlamentarne skupštine BiH traje četiri godine.
- b) Član Parlamentarne skupštine BiH može biti svaki punoljetni građanin Bosne i Hercegovine koji ima biračko pravo.
- c) Član Parlamentarne skupštine BiH ne smije obavljati nikakvu drugu izbornu ili javnu dužnost dok mu traje mandat u Parlamentarnoj skupštini BiH, u skladu sa Zakonom o sukobu interesa.

### **4. Poslovnik o radu Parlamentarne skupštine BiH**

Svaki dom donosi poslovnik o radu.

### **5. Predsjednik i potpredsjednici domova Parlamentarne skupštine BiH**

- a) Domovi Parlamentarne skupštine BiH imaju predsjednika i dva zamjenika predsjednika koji se biraju većinom glasova svojih članova. Predsjednik i zamjenici predsjednika ne mogu biti iz istog konstitutivnog naroda.
- b) Predsjednik Predstavničkog doma Parlamentarne skupštine BiH predstavlja Parlamentarnu skupštinu BiH i odgovoran je za njeno funkcioniranje.
- c) Predsjednik doma odgovoran je za efikasno funkcioniranje doma, predstavlja dom pred drugim organima vlasti i obavlja druge dužnosti utvrđene zakonom i poslovníkom doma.
- d) Zamjenik predsjednika doma pomaže predsjedniku u obavljanju njegovih dužnosti utvrđenih zakonom i poslovníkom.
- e) Predsjednik i zamjenici predsjednika biraju se na mandat od četiri godine, a razrješavaju se na isti način kako su i izabrani.
- f) Predsjednik Predstavničkog doma, predsjednik Doma naroda i predsjednik Vijeća ministara BiH ne mogu biti iz istog konstitutivnog naroda.

## **6. Sjednice domova Parlamentarne skupštine BiH i sjednice Parlamentarne skupštine BiH**

- a) Sjednice doma saziva predsjednik doma, u skladu s poslovníkom.
- b) Svaki dom bit će sazvan u Sarajevu, najkasnije 30 dana nakon održavanja izbora.
- c) Na zahtjev predsjednika Parlamentarne skupštine BiH, predsjednika Vijeća ministara BiH, predsjednika Bosne i Hercegovine, ili 1/3 članova Parlamentarne skupštine BiH koja uključuje 1/3 članova svakog doma, saziva se vanredna sjednica Parlamentarne skupštine BiH.

## **7. Nadležnosti Predstavničkog doma**

- a) Predstavnički dom ima nadležnosti nad svim zakonima.
- b) Predstavnički dom:
  - i. usvaja ustavne amandmane;
  - ii. usvaja zakone;
  - iii. odlučuje o izvorima i iznosima sredstava za funkcioniranje institucija i izmirivanje međunarodnih obaveza BiH;
  - iv. usvaja budžet institucija BiH i međunarodnih obaveza BiH;
  - v. ratificira međunarodne sporazume;
  - vi. učestvuje u izboru Predsjedništva BiH, u skladu s ovim ustavom ;
  - vii. potvrđuje predsjednika Vijeća ministara BiH i liste ministara;
  - viii. nadzire rad Vijeća ministara BiH i drugih institucija odgovornih domu, u skladu s Ustavom BiH i zakonom;
  - ix. kandidira i bira lica na dužnosti propisane Ustavom BiH i zakonom;
  - x. ima sva druga ovlaštenja i dužnosti koje su mu dodijeljene Ustavom BiH i zakonom.

## **8. Nadležnosti Doma naroda**

- a) razmatra sve zakone koje usvoji Predstavnički dom, a koji se odnose na vitalni nacionalni interes. Dom naroda ima pravo veta za zaštitu vitalnog nacionalnog interesa u skladu sa stavom 10. ovog člana;
- b) usvaja ustavne amandmane;
- c) učestvuje u izboru predsjednika i potpredsjednika Bosne i Hercegovine, u skladu s ovim ustavom.

## **9. Zakonodavne procedure**

- a) Vijeće ministara BiH i članovi oba doma Parlamentarne skupštine BiH mogu predlagati zakone. Prijedlozi zakona podnose se Predstavničkom domu.

- b) Glasanja su javna i unose se u zapisnik, osim ako nije drugačije utvrđeno Ustavom BiH i poslovnikom o radu.
- c) Većina svih članova izabраниh u Predstavnički dom čini kvorum.
- d) Sve odluke u Predstavničkom domu donose se većinom glasova onih koji su prisutni i glasaju.
- e) U Predstavničkom domu članovi će ulagati najveće napore kako bi većina uključivala najmanje jednu trećinu glasova članova s teritorije svakog entiteta. Ako većina ne uključuje jednu trećinu glasova članova s teritorije svakog entiteta, predsjednik Doma i njegovi zamjenici će, radeći kao komisija, nastojati da, u roku od tri dana od dana glasanja, postignu saglasnost. Ako ta nastojanja ne uspiju, odluke će biti donesene većinom onih koji su prisutni i glasaju, pod uslovom da glasovi protiv ne uključuju dvije trećine, ili više, članova izabраниh iz svakog entiteta.
- f) Svaki klub u Domu naroda odluke donosi prostom većinom.
- g) Nakon usvajanja u Predstavničkom domu, zakoni se upućuju Domu naroda. Svaki klub konstitutivnog naroda ima pravo, u roku 15 dana od dana prijema zakona, ako smatra da je tim zakonom povrijeđen vitalni nacionalni interes, pokrenuti proceduru za zaštitu vitalnog nacionalnog interesa, tako što će se pozvati na pravo veta za zaštitu vitalnog nacionalnog interesa. Ako u propisanom roku ne bude pokrenuta procedura zaštite vitalnog nacionalnog interesa, zakon izglasan u Predstavničkom domu je usvojen.
- h) Osim ako se i dok se uloženi veto ne ospori, odgovarajući klub u Domu naroda radit će na amandmanima zakona za koje se utvrdi da su štetni po vitalni nacionalni interes, tako da se oni više ne smatraju štetnim.
- i) Ako odgovarajući klub u Domu naroda izmijeni neki zakon, taj zakon mora se ponovo proslijediti Predstavničkom domu na potvrđivanje u roku od 30 dana od dana ulaganja veta.
- j) Parlamentarna skupština BiH objavljuje potpuni zapisnik svojih rasprava, te će, osim u izuzetnim okolnostima i u skladu sa svojim poslovnikom, svoje rasprave obavljati javno.
- k) Zakonski akti stupaju na snagu nakon objavljivanja u "Službenom glasniku BiH".

## **10. Pravo veta za zaštitu vitalnog nacionalnog interesa**

- a) Konstitutivni narodi Bosne i Hercegovine imaju neotuđivo pravo zaštite vitalnog nacionalnog interesa.
- b) Vitalni nacionalni interes štiti se putem prava veta za zaštitu vitalnog nacionalnog interesa.
- c) Vitalni nacionalni interes štiti se i na državnom nivou.
- d) Na pravo veta za zaštitu vitalnog nacionalnog interesa može se pozvati u Domu naroda u pogledu:
  - i. prava sva tri konstitutivna naroda da budu zastupljeni u zakonodavnim, izvršnim i sudskim organima, te da imaju jednaka prava učešća u procesima donošenja odluka;

- ii. identiteta konstitutivnog naroda;
- iii. teritorijalne organizacije;
- iv. organiziranja javnih organa vlasti;
- v. obrazovanja;
- vi. upotrebe jezika i pisma;
- vii. nacionalnih simbola i zastava;
- viii. duhovnog naslijeđa, posebno njegovanja i potvrđivanja vjerskog i kulturnog identiteta i tradicija;
- ix. očuvanja integriteta Bosne i Hercegovine;
- x. sistema javnog informiranja;
- xi. amandmana na Ustav BiH;
- xii. svakog pitanja koje 2/3 jednog kluba u Domu naroda proglasi pitanjem od vitalnog nacionalnog interesa.

e) Razmatranje korištenja prava veta s ciljem zaštite vitalnog nacionalnog interesa

- i. Zahtjev za pozivanje na pravo veta za zaštitu vitalnog nacionalnog interesa upućuje Domu naroda radi stavljanja na dnevni red većina delegata iz jednog od klubova konstitutivnih naroda, za slučajeve iz stava 10.d. od i. do xi. i 2/3 delegata iz reda jednog konstitutivnog naroda za slučajeve iz stava 10.d. xii. Klub konstitutivnog naroda koji se poziva na pravo veta za zaštitu vitalnog nacionalnog interesa dužan je u roku od tri dana od dana upućivanja zahtjeva iz prethodnog stava dostaviti u pisanoj formi obrazloženje razloga pozivanja na pravo veta.
- ii. Ako većina delegata jednog od klubova ostalih konstitutivnih naroda smatra da je neosnovano upućeno pozivanje na veto za zaštitu vitalnog nacionalnog interesa, mogu uputiti žalbu Ustavnom sudu BiH u roku od 10 dana od dana dostavljanja pisanog obrazloženja.
- iii. Ustavni sud BiH može odlučiti, u skladu s državnim zakonom i Ustavom BiH, da li je pozivanje na veto dopušteno (proceduralna ocjena) i da li je interes imao kvalifikaciju vitalnog nacionalnog interesa i da li je njime povrijeđen vitalni nacionalni interes (ocjena merituma).

- iv. Ustavni sud BiH dužan je donijeti odluku i dostaviti je Parlamentarnoj skupštini BiH u roku od 15 dana od dana prijema žalbe.
- v. Ako Ustavni sud BiH odluči da odredbe usvojenog zakona nisu štetne po vitalni nacionalni interes, zakon je usvojen danom objavljivanja odluke Ustavnog suda BiH i stupa na snagu po objavljivanju.
- vi. Ako Ustavni sud BiH utvrdi da je zakon štetan po vitalni nacionalni interes, Predstavnički dom dužan je izmijeniti zakon, kako ne bi bio štetan po vitalni nacionalni interes, a u skladu s odlukom Ustavnog suda BiH.

## 11. Raspuštanje Parlamentarne skupštine BiH

- a) Parlamentarna skupština BiH može samu sebe raspustiti u skladu s poslovníkom o radu.
- b) Parlamentarna skupština BiH raspušta se u slučaju kada Predstavnički dom ne uspije izabrati predsjednika Vijeća ministara / premijera ni nakon trećeg kruga glasanja.

Ovim odredbama zamjenjuju se odredbe člana IV. Ustava BiH, osim stava 1. tačke 2. „Predstavnički dom“ u kojem se broj „42“ zamjenjuje brojem „87“, a ostali tekst u stavu 1. ostaje nepromijenjen.

### *Amandman III. Aprilskog paketa*

*U Ustavu BiH član V. stav 1. i tač. 1. 2. i 3. mijenjaju se i glase:*

#### **Predsjedništvo BiH**

Bosna i Hercegovina ima Predsjedništvo koje čine jedan predsjednik i dva potpredsjednika. Predsjednik Predsjedništva BiH je predsjednik Bosne i Hercegovine (u daljnjem tekstu: predsjednik), a potpredsjednici u Predsjedništvu BiH su potpredsjednici Bosne i Hercegovine (u daljnjem tekstu: potpredsjednici). Predsjednik i potpredsjednici ne smiju biti iz istog konstitutivnog naroda.

1. Predsjednik saraduje s Parlamentarnom skupštinom BiH i Vijećem ministara BiH, kao i ostalim institucijama BiH, kako bi se osiguralo redovno i djelotvorno funkcioniranje države.



## **2. Izbor i trajanje mandata**

- a) Kandidati za članove Predsjedništva BiH mogu biti nominirani od 20% članova Doma naroda ili 10% članova Predstavničkog doma. Kandidati će biti direktno izabrani članovi Parlamentarne skupštine BiH. Članovi mogu podržati nominaciju samo jednog kandidata.
- b) Klubovi konstitutivnih naroda u Domu naroda većinom glasova svakog kluba na osnovu nominiranih prijedloga biraju po jednog kandidata što čini listu s tri kandidata.
- c) Lista s tri predložena kandidata za predsjednika i dva potpredsjednika Bosne i Hercegovine upućuje se Predstavničkom domu na potvrđivanje.
- d) Lista mora sadržavati najmanje po jednog člana Predsjedništva BiH iz svakog entiteta i najviše po jednog člana Predsjedništva BiH iz svakog naroda.
- e) Mandat članova Predsjedništva BiH traje četiri godine i mogu biti birani na još jedan uzastopni mandat.
- f) Izbor predsjednika rotacijom ili na drugi način odredit će Parlamentarna skupština BiH.
- g) Prije preuzimanja dužnosti članovi Predsjedništva BiH moraju položiti službenu zakletvu u skladu sa zakonom.

## **3. Procedure**

Predsjednik i dva potpredsjednika donose poslovnik o radu.

## **4. Dužnosti i ovlaštenja predsjednika**

- a.) Predsjednik:
  - i. predstavlja državu;
  - ii. potpisuje i proglašava zakone;
  - iii. imenuje i razrješava ambasadore i izaslanike u skladu s državnim zakonom;
  - iv. potpisuje međunarodne sporazume u skladu s državnim zakonom nakon ratifikacije u Parlamentarnoj skupštini BiH;
  - v. dodjeljuje odlikovanja i druga priznanja u skladu s državnim zakonom;
  - vi. akreditira i prima ambasadore i izaslanike u skladu s državnim zakonom;
  - vii. daje pojedinačna pomilovanja, u skladu s državnim zakonom;

- viii. može zatražiti sazivanje sjednica Vijeća ministara BiH i Parlamentarne skupštine BiH, te predlagati njihov dnevni red i učestvovati na sjednicama;
- ix. nominira kandidata za predsjednika Vijeća ministara BiH, a nakon konsultacija s potpredsjednicima i parlamentarnim strankama;
- x. podnosi izvještaje po zahtjevu, ali najmanje jednom godišnje Parlamentarnoj skupštini BiH o troškovima Predsjedništva BiH;
- xi. obavlja ostale funkcije koje mogu biti potrebne za izvršavanje njegovih dužnosti, ili koje mu povjeri Parlamentarna skupština BiH, u skladu s Ustavom BiH i zakonom.

**b) Predsjedništvo BiH koje predstavlja jedinstvo države isključivo konsenzusom**

- i) regulira pitanja odbrane Bosne i Hercegovine, u skladu s državnim zakonom;
- ii) imenuje sudije Ustavnog suda BiH u skladu s Ustavom BiH i državnim zakonom;
- iii) imenuje članove Upravnog odbora Centralne banke BiH.

**c) Zahtjev predsjednika za ponovno razmatranje zakona**

- i) u roku od jedne sedmice od donošenja zakona, predsjednik može od Parlamentarne skupštine BiH tražiti da ponovo razmotri zakon ili dio zakona;
- ii) predsjednik mora navesti razloge i argumente kako bi objasnio zašto je zatražio ponovno razmatranje u Parlamentarnoj skupštini BiH;
- iii) Parlamentarna skupština BiH mora razmotriti, te u pisanoj formi odgovoriti na argumente predsjednika;
- iv) predsjednik može zahtijevati ponovno razmatranje zakona samo jednom po svakom pojedinačnom zakonu;
- v) predsjednik je obavezan da potpisuje zakone kako ih je usvojila Parlamentarna skupština BiH.

**5. Spriječenost predsjednika / potpredsjednika da obavlja dužnosti**

- a) U slučaju da predsjednik privremeno ne može obavljati svoje dužnosti, imenovat će potpredsjednika da preuzme njegove dužnosti.

- b) Predsjednik / potpredsjednik odstupit će s dužnosti ako mu je zdravlje narušeno u toj mjeri da ne može obavljati dužnost i neće se oporaviti u razumnom roku.
- c) Ako nije jasno da li je predsjednik / potpredsjednik sposoban obavljati svoje dužnosti, Ustavni sud BiH utvrđuje njegovu sposobnost na zahtjev Vijeća ministara BiH, 1/3 članova Predstavničkog doma ili druga dva člana Predsjedništva BiH zajedno.

## **6. Smjenjivanje predsjednika / potpredsjednika**

- a) Predstavnički dom ima ovlaštenje da smijeni predsjednika / potpredsjednika.
- b) Predsjednik / potpredsjednik može biti smijenjen zbog nekompetentnosti i(ili) u slučaju kršenja Ustava BiH, zakona ili obavezujuće norme međunarodnog prava.
- c) Predstavnički dom Parlamentarne skupštine BiH može pokrenuti prijedlog za smjenu predsjednika / potpredsjednika.
- d) Ako 2/3 članova Predstavničkog doma Parlamentarne skupštine BiH, koja uključuje minimalno  $\frac{1}{2}$  poslanika iz naroda kojem pripada predsjednik/potpredsjednik, glasa za smjenu predsjednika/ potpredsjednika, on napušta dužnost.

## **7. Ostavka predsjednika / potpredsjednika**

- a) Predsjednik / potpredsjednik može podnijeti ostavku.

## **8. Zamjena**

Izbor novog predsjednika /potpredsjednika kojem je prestao mandat u slučajevima navedenim u st. 5., 6., i 7. održava se u roku od 15 dana u skladu sa zakonom.

## **9. Krivična odgovornost predsjednika/potpredsjednika**

- a) Predsjednik / potpredsjednik ne smatra se krivično odgovornim pred domaćim sudovima za djela izvršena prema i u skladu sa svojim zvaničnim dužnostima u toku trajanja mandata.
- b) Ustavni sud BiH ocjenjuje da li je djelo koje izvrši predsjednik / potpredsjednik prema i u skladu s njegovim zvaničnim dužnostima.

Ovim odredbama zamjenjuju se odredbe člana V. tač. 1. 2. i 3. Ustava BiH.

### ***Amandman IV. Aprilskog paketa***

***U Ustavu BiH u članu V. tačka 4. mijenja se i glasi:***

#### **Vijeće ministara BiH**

Vijeće ministara BiH je institucija izvršne vlasti države Bosne i Hercegovine.

Vijeće ministara BiH ima obavezu i odgovornost prema građanima i narodima Bosne i Hercegovine putem Parlamentarne skupštine BiH.

Predsjednik Vijeća ministara BiH, odnosno premijer i ministri zajedno čine Vijeće ministara BiH. Predsjednik Vijeća ministara BiH, odnosno premijer predsjedava sjednicama Vijeća ministara BiH.

#### **1. Izbor i mandat**

- a) Predstavnički dom Parlamentarne skupštine BiH bira Vijeće ministara BiH na početku svakog novog mandata Parlamentarne skupštine BiH.
- b) Strukturu Vijeća ministara BiH odredit će Parlamentarna skupština BiH.
- c) Predsjednik Vijeća ministara / premijer ne može preuzeti dužnost dok ne bude potvrđeno cjelokupno Vijeće ministara BiH.
- d) Nakon što se uspostavi, Vijeće ministara BiH će među svojim članovima izabrati dva zamjenika premijera.
- e) Predsjednik Vijeća ministara / premijer i zamjenici predsjednika ne mogu biti iz istog konstitutivnog naroda.

#### **2. Izbor predsjednika Vijeća ministara /premiera**

- a) Predsjednik Bosne i Hercegovine, nakon konsultacija s političkim strankama zastupljenim u Predstavničkom domu Parlamentarne skupštine BiH, predlaže Predstavničkom domu kandidata za predsjednika Vijeća ministara / premijera na potvrđivanje.
- b) Ako kandidat za predsjednika Vijeća ministara / premijera ne bude potvrđen, predsjednik će ponovo predložiti tog ili drugog kandidata u roku od narednih deset dana.
- c) Ako kandidat kojeg je predložio predsjednik ne bude potvrđen u drugom krugu glasanja, članovi Predstavničkog doma imat će ovlaštenja da predlože kandidate za predsjednika Vijeća ministara / premijera. Podrška barem 1/6 članova Predstavničkog doma bit će potrebna za nominaciju kandidata za predsjednika Vijeća ministara / premijera.
- d) U trećem krugu glasanja, glasa se o kandidatu predsjednika koji u drugom krugu nije dobio podršku i kandidatima koje je nominirao Predstavnički dom. Prvo se glasa o kandidatu predsjednika, a zatim, redom kako su predlagani, o kandidatima koje je nominirao Predstavnički dom.

- e) Kandidat koji prvi dobije potrebnu većinu bit će potvrđen kao predsjednik Vijeća ministara / premijer.

### **3. Izbor ministara**

- a) Predsjednik Vijeća ministara / premijer će, nakon potvrđivanja, podnijeti Predstavničkom domu Parlamentarne skupštine BiH listu kandidata za Vijeće ministara BiH.
- b) Političke stranke koje teže formiranju koalicije ponudit će listu kvalificiranih kandidata predsjedniku Vijeća ministara / premijeru s koje će on izabrati listu.
- c) Ako predloženu listu ne potvrdi Predstavnički dom, predsjednik Vijeća ministara / premijer predložit će novu listu. Proces se ponavlja dok lista ne dobije potrebnu većinu.
- d) Ako Predstavnički dom ne uspije potvrditi listu kandidata u roku od 30 dana, predsjednik Vijeća ministara / premijer gubi svoj mandat, a Predstavnički dom bira novog predsjednika Vijeća ministara / premijera, u skladu s ovim ustavom.
- e) Svi ministri stupit će na dužnost nakon što ih potvrdi Predstavnički dom.

### **4. Trajanje mandata**

Mandat Vijeća ministara BiH počinje danom potvrđivanja, a završava na dan kada se potvrdi novo Vijeće ministara.

### **5. Nadležnost**

Vijeće ministara BiH će:

- a) braniti Ustav BiH i štiti ustavna prava i dobrobit svih građana i naroda;
- b) izvršavati nadležnosti Bosne i Hercegovine;
- c) osigurati suverenitet i teritorijalni integritet, političku nezavisnost i međunarodni subjektivitet, te unutrašnju i vanjsku sigurnost države Bosne i Hercegovine u skladu s Ustavom BiH i zakonom;
- d) voditi vanjsku politiku Bosne i Hercegovine;
- e) izvršavati i provoditi akte Parlamentarne skupštine BiH;
- f) predlagati zakone Parlamentarnoj skupštini BiH;
- g) predlagati budžet Parlamentarnoj skupštini BiH;
- h) donositi uredbe i propise potrebne za provođenje zakona;
- i) usmjeravati rad institucija Vijeća ministara BiH;
- j) osigurati efikasno i djelotvorno funkcioniranje države, u skladu s Ustavom BiH i zakonom;
- k) osigurati da država Bosna i Hercegovina ispunjava svoje domaće i međunarodne obaveze u skladu sa Ustavom BiH i zakonom;
- l) obavljati sve druge dužnosti povjerene Ustavom BiH i zakonom.

### **6. Ovlaštenja i dužnosti predsjednika Vijeća ministara / premijera i ministara**

#### **6.1. Ovlaštenja i dužnosti predsjednika Vijeća ministara / premijera**

- a) Predsjednik Vijeća ministara / premijer bit će ministar bez portfelja i odgovoran je za upravljanje i djelotvorno funkcioniranje Vijeća ministara BiH.
- b) Predsjednik Vijeća ministara / premijer, zajedno s ministrima, odgovoran je za rad Vijeća ministara BiH.
- c) Predsjednik Vijeća ministara / premijer:
  1. utvrđuje prioritete, sadržaj i opći pravac rada Vijeća ministara BiH;
  2. predsjedava sjednicama Vijeća ministara BiH;
  3. osigurava jedinstvo Vijeća ministara BiH;
  4. organizira i usmjerava rad Vijeća ministara BiH;
  5. podnosi izvještaje Parlamentarnoj skupštini BiH o radu Vijeća ministara BiH;
- d) Predsjednik Vijeća ministara / premijer može staviti van snage akte i propise koje donesu ministri prema stavu 6.2.(b.4) ako oni ne osiguraju efikasno provođenje zakona.

## 6. 2. Ovlaštenja i dužnosti ministara

- a) Ministri djeluju kolektivno kao Vijeće ministara BiH, a dužnosti obavljaju pojedinačno kao čelnici svojih ministarstava.
- b) Svaki ministar vodi poslove svog ministarstva samostalno i na vlastitu odgovornost, i obavezan je da :
  1. izvršava politiku Vijeća ministara BiH, provodi zakone, propise i akte Vijeća ministara BiH u okviru svog ministarstva i zadatke koje dobije od predsjednika Vijeća ministara / premijera;
  2. predlaže i daje preporuke u vezi sa zakonima u okviru svog ministarstva;
  3. usmjerava, koordinira i nadgleda aktivnosti svog ministarstva;
  4. donosi propise kako bi se olakšalo provođenje i primjena zakona koji se odnose na njegovo ministarstvo kao i onih koji utiču na pitanja koja mu povjeri predsjednik Vijeća ministara / premijer u skladu s Ustavom i zakonima Bosne i Hercegovine;
  5. formulira, objašnjava i analizira prijedloge budžeta koji se odnose na njegovo ministarstvo;
  6. odgovara na upite Parlamentarne skupštine BiH koji se odnose na pitanja njegovog ministarstva;
  7. pomaže predsjedniku Vijeća ministara / premijeru u izvršavanju i provođenju politike Vijeća ministara BiH i zakona.

## 7. Dodatne odredbe

- a) Sastav, način donošenja odluka, ostavke, opoziv, izglasavanje nepovjerenja i druga pitanja značajna za rad Vijeća ministara BiH uređuju se zakonom.
- b) Ministarstva i njihove nadležnosti utvrđuju se zakonom.

Ovim odredbama zamjenjuju se odredbe člana V. tačka 4. Ustava BiH, osim tačke 4.b) ovog člana.

